



SIARAN MEDIA

JABATAN WILAYAH PERSEKUTUAN

PROGRAM SEMARAK AIDILFITRI MENYERIKAN HARI RAYA 500 WARGA WILAYAH PERSEKUTUAN PUTRAJAYA YANG KURANG BERKEMAMPUAN 24 APRIL 2025

Dalam membangunkan Malaysia MADANI yang sentiasa cakna dengan keperluan rakyat, Jabatan Wilayah Persekutuan bersama Perbadanan Putrajaya menganjurkan acara majlis tahunan bagi komuniti Putrajaya menerusi Program Semarak Aidilfitri 2025/1446H. YB Datuk Seri Dr. Zaliha binti Mustafa, Menteri di Jabatan Perdana Menteri (Wilayah Persekutuan) hari ini menyerahkan sumbangan zakat berupa wang tunai sebanyak RM200.00 kepada 300 orang asnaf di Wilayah Persekutuan Putrajaya termasuk anak-anak yatim, warga emas, ibu tunggal, OKU dan mereka yang kurang berkemampuan. Baki 200 penerima akan menerima sumbangan secara berperingkat. Sumbangan yang disampaikan dalam Program Semarak Aidilfitri ini merupakan sumbangan wang zakat daripada Majlis Agama Islam Wilayah Persekutuan yang diperolehi daripada pembayar-pembayar zakat di ketiga-tiga Wilayah Persekutuan.

Pemilihan penerima sumbangan ini dipilih melalui senarai asnaf yang berdaftar dengan MAIWP, sistem eKasih dan Jabatan Kebajikan Masyarakat. Kategori asnaf yang dipilih juga termasuk golongan fakir, miskin, al-gharimin, al-riqab, fisabillah dan muallaf. Melalui penganjuran program Semarak Aidilfitri Wilayah Persekutuan Putrajaya ini, pihak kerajaan dapat menyantuni golongan miskin yang seterusnya dapat meringankan beban golongan ini selaras dengan penekanan kerajaan untuk peduli dan belas kasihan selari dengan aspirasi Malaysia MADANI Ihsan dalam memastikan kebajikan rakyat terus terpelihara. Malah, keseluruhan 2,500 penerima sumbangan Aidilfitri Wilayah Persekutuan pada tahun ini dapat menikmati kegembiraan dan keceriaan dalam merai sambutan Aidilfitri.

Diharapkan melalui pelaksanaan program Semarak Aidilfitri di ketiga-tiga Wilayah Persekutuan ini dapat menjadi wadah untuk menyemai dan menyemarakkan nilai-nilai kesejahteraan, keamanan, keadilan, kemakmuran dan kebajikan dalam masyarakat. Ini selari dengan matlamat kerajaan untuk meningkatkan taraf hidup dan kesejahteraan rakyat secara menyeluruh, menerusi pendekatan pembangunan bandar yang inklusif dan berteraskan nilai tanpa mengira latar belakang.

Disediakan oleh:

Bahagian Komunikasi Korporat

Jabatan Wilayah Persekutuan

24 April 2025

